



15
1367
3



門 45
1367
3

說略卷之五

人紀

江寧顧起元太初輯

計然曰人受命于天地變化而生一月而膏二月而
脉三月而胚謂如水泡之狀四月而胎謂如水中蝦
蟆胎也五月而筋六月而骨七月而成形八月而動
九月而躁十月而生又按寶積經云是諸衆生托胎
在母腹中三十七箇七日有二十九種業風所吹次
第成就第一七日狀如酪醬第二七日狀如凝酪第

說各

卷之五

昭和丁丑年
三月十八日
購求

三七日狀如藥杵第四七日狀如鞵援第五七日分
頭臂胫第六七日肘膝相見第七七日手足掌現第
八七日二十指現第九七日九孔方現第十七日聲
音俱足第十一七日九孔開通第十二七日生腸節
孔第十三七日生饑渴想第十四七日生九萬筋第
十五七日生八萬脉第十六七日通出入息第十七
七日食道漸寬第十八七日并十九七日六根俱足
第二十七日徧生骨節第二十一七日并二十二二
十三七日生血肉皮第二十六七日生毛髮爪第二

十七七日分善惡相第二十八七日妄生八想第二
十九三十七日黑白隨業第三十一至三十六七日
身相俱足第三十七七日念欲出生第三十八七日
滿十箇月向母產門倒卓而生

太平廣記中載一女子飲小吏盥水因情感有素遂
懷孕生男又枝山野記中載一婦人因思夫成病家
人令男子手摩其腹遂孕生一手事誠怪異然攷法
苑珠林云有七事受胎一相觸受胎如人月水去時
喜樂男子以身觸以身觸其身分卽生貪著而便懷

胎二取衣受胎如優旃夷共婦出家愛欲不止各相
發問欲精汚衣尼取舐之復取內根即便懷胎三下
精受胎如鹿母鯁道士精欲心而飲遂便懷胎四手
摩受胎如睽菩薩父母俱盲出家爲道不合陰陽手
摩臍下即便懷胎五見色受胎如有一女人月華水
成不得男子合欲情盛唯視男子如宮女亦復如是
即便懷胎六聞聲受胎如白鷺鳥悉雌無雄春陽時
節雷鳴初發一心聞聲即便懷胎七鯁香受胎如秦
母牛但鯁犢氣即便懷胎

華胥履大人之跡而生伏羲一曰感青虹繞身而生
庖犧女媧感瑤光而生顓頊慶都與赤龍合而生唐
堯女登見大虹而生虞舜修紀見洞流星而生夏禹
簡狄感玄鳥而生契夫都見白氣貫月而生殷湯大
任夢見長人而生文王顏徵在感黑帝而生孔子劉
媪感赤龍而生漢祖又高辛亦感巨跡后稷亦然神
農亦感赤龍黃帝亦感大虹少昊亦感流星老子感
火星微子感牽牛星顏淵感中台星蕭何感昴星張
良感弧星樊噲感狼星東方朔感太白星李白感長

庚星若此之類皆聖賢受天瑞相感而生不得謂其誣也

漢高醉臥酒家其上常有龍怪隋文幼在母懷忽見其鱗角郭璞睡時有人見形變鼉云是鼉精杜預醉臥郡齋而嘔小吏窺見大蛇垂頭于床蔡君謨臥病夢憑鼓而睡譙卒夜見大蛇盤于鼓上周詢醉而假寐園吏見大蛇垂于欄楯祿山醉臥化爲異猪而龍首尚書鄭愚因醉眠左右見一白猪錢武肅臥有一大蜥蜴翁油缸將竭韓世忠宿直梁夫人見一黑虎

蹲踞楊大年初生遍身羽毛宛然一鶴宋中貴楊戩臥床上盜入室中見之乃一蝦蟆大可如床兩目金精光彩射人米芾知楚州常問鼓吏何以不打三更吏曰鼓有大白蛇圍繞故不敢打芾笑諾人知芾爲鱗精也

張衡乃蔡邕後身見語林羊祜乃鄰人李氏子後身見本傳王練乃胡沙門後身見冥祥記顧總是劉楨後身見玄怪錄岳陽王詹乃許玄度後身處州什知威乃徐陵後身並見高僧傳房瑄乃永公後身見明

皇雜錄韋臯乃諸葛亮後身見宣室志江南邊鎬乃
謝康樂後身見玉壺清話潘佑乃顏延之後身見南
唐書劉沆乃牛僧孺後身見宋史范祖禹乃鄧禹後
身見家傳張安道乃琅琊僧後身見侯鯖錄馮京乃
五臺僧後身見談圃蘇東坡乃五戒和尚後身見志
林又爲鄒陽十三世後身見春渚紀聞王介甫乃秦
王後身見貴耳集黃山谷乃女子後身見春渚紀聞
趙鼎乃李德裕後身見坦齋筆衡王十朋乃嚴伯威
闍黎後身見文集真西山乃草菴和尚後身見癸辛

雜識

古云陸終氏娶鬼方氏之女孕而不育十一年開其
左脇而出三人又開其右脇而出三人曰昆吾已姓
曰參胡董姓曰彭祖彭姓曰會人妘姓曰安曹姓曰
季連芊姓譙周古史考以爲妄記廢而不論干寶論
曰前志所傳修己背坼而生啟魏狄胷坼而生契獨
異志言禹妻化石剖腹而生禹簡黃初五年汝南屈
雍妻王氏生男從右脇下水腹上出而平和自若數
月創合母子無恙李勢末年馬氏妊從脇生子母無

恙宋武帝時武寧楊歡妻妊女從股中生李宣妻樊氏義熙中懷妊過期不孕而額上有創兒穿之以出長爲將後魏肅宗熙平二年并州人韓僧真女從母右脇而出胡太后令付掖廷養之宋莆田尉舍有人妻生男從股髀出創合母子無恙祝允明野記亦載徐州婦人事然佛典稱釋迦生於摩耶夫人之右脇神仙傳老子母懷之七十歲生時剖其左腋理固有之不足怪也太平御覽又載異苑晉時常山趙宣母妊身如常而髀上痒搔之成瘡兒從瘡出母子平安

唐志大順元年資州兵王全義妻孕漸下至股入足拇指痛坼生珠漸大如杯此又抑奇矣

古有生育之多者漢中山靖王勝男女百二十人梁鄱陽王恢男女百人宋張耆四十二男子馮行已兒息二十二人本朝慶成王生子一百人皆隆準每會紫玉滿座至不能相識古今所未有之奇也

古帝王之相貌如天皇頤羸三舌驤首鱗身碧盧禿偁地皇馬躄妝首泰皇龍軀驤首達腋黃神氏黃頭大腹辰放氏渠頭四乳皇覃氏兌頭日角倉帝史皇

氏龍顏侈哆四目靈光伏羲女蝸蛇身人首一曰伏羲長頭脩目龜齒龍唇眉有白毫鬚垂委地一曰龍身牛首渠肩達腋山準日角歲目珠衡駿毫翁鼠身長九尺有一寸女媧一曰虵身牛首宣髮神農人身牛首戴玉英玉勝一曰長八尺七寸弘身牛額龍顏大唇懷成鈐戴玉理黃帝身逾九尺附函挺朶修髯花瘤河目隆額日角龍顏少昊秀外龍庭月縣通顛顛頤渠頭併榦通眉帶午帝嚳方顛龐覲珠庭化齒戴于帝堯身侷十尺豐下兌上龍顏日角八采三眸

鳥庭荷勝琦衣射出握嘉履豸竅息洞通帝舜長九尺龍顏日衡方庭大口面覲亡髦懷珠握袞形卷婁色黑重瞳禹虎鼻大口兩耳三漏首戴鈎鈐胸有玉斗足文履已又云長頸鳥喙湯豐下兌上珠庭皙而有髯倨身而揚聲臂有四肘文王龍顏虎肩曾有四乳武王駢齒秦始皇蜂準長目鷲鳥膺豺聲漢高祖隆準龍顏美鬚髯左股有七十二黑子光武隆準日角大口美鬚眉昭烈臂垂過膝顧見其耳晉武帝炎髮委地手過膝齊太祖道成龍額鐘聲鱗文徧體梁

武帝衍兩髀駢骨頭頂上隆起有文在左右手曰武
陳武帝霸先日角龍顏垂手過膝齊神武歡目有精
光長頭高顴齒白於玉文宣帝洋鱗身重踝周文帝
泰方頰廣額美鬚髯髮長委地垂手過膝背有黑子
宛轉若龍盤之形隋高祖龍顏長上短下額有五柱
入頂目光外射有文在手曰王唐太宗龍鳳之姿天
日之表虬鬚可以挂弓宋太祖正黑色方面大耳其
閏位方隅者項羽目重瞳子力能扛鼎喑鳴叱詫千
人皆廢王莽侈口蹙頰露眼赤睛大聲而嘶長七尺

五寸反膺高視瞰臨左右孫權紫髯方頰大口長上
短下劉淵子聰俱猿臂淵鬚長三尺餘當心有赤毫
毛三根長三尺六寸聰左耳毫長二尺非常光澤聰
又生而眉白鬚四尺餘劉曜鬚百莖皆長五尺慕容
皝龍顏版齒慕容垂手垂過膝苻堅背有赤文隱起
成字曰草付臣又土王臂垂過膝面有紫光慕容德
額有日角偃月圭文魏什翼犍隆準龍顏立髮委地
臥則乳垂至蓆

徐偃王之狀目可瞻焉仲尼之狀面如蒙俱周公之

狀身如斷菑皐陶之狀色如削爪閔天之狀面無見
膚傳說之狀身如植鰭伊尹之狀面無須麋見荀子
周公背僂皐陶馬口孔子反羽蒼頡四目重耳此脇
蘇秦骨鼻見王充論衡子產日角晏平仲月角尾生
犀角柳下惠史魚反角見天中記衛靈公臣曰公孫
呂面長三尺濶三寸爲衛國賢臣見荀子與曹植相
論東漢趙翁伯晝寢羣孫戲納李干其臍中後李爛
流出核數之凡得七枚見獨異志司馬懿目顧見背
見魏史唐大曆中洛陽尉苗登有尾長二尺餘見獨

異志毗騫王身長二丈頭長三尺見杜佑通典

祖庭廣記先聖生有異質凡四十九表反首注面月
角日準河日海口龍頰斗唇昌顏均頤輔喉駢齒龍
形龜脊虎掌胼脇修肱叅膺圩頂山臍林背翼臂注
頭阜腴堤眉地足谷竅雷聲澤腹上趨下未僂後耳
面如蒙俱手垂過膝耳垂珠庭眉二十彩目六十四
理立如鳳峙坐如龍蹲手握天文足履度字望之如
仆就之如升視若營四海躬履謙讓胸有文曰制作
定世符身長九尺六寸腰大十圍又按先聖四十九

表採於萇弘之所談姑布子卿之所稱老萊弟子之所識與荀卿司馬遷輩之所述者蓋云備矣然緯書曾載胸應矩舌理七重及鈞文在手等處又弗及焉是足以盡聖人之儀觀歟

舜嘗重瞳而帝天下矣項羽亦重瞳而霸西楚卒勿烏江李煜太子目有重瞳自有以爲必統一天下不修武備敗降于宋臣亦有重瞳者沈約左目重瞳腰有紫痣梁武帝受禪拜爲尚書僕射後梁康王友敬目重瞳謀作亂梁主覺之伏誅魚俱羅相表雄異目

有重瞳隋煬帝忌之被誅廬山智常禪師目有重瞳遂以藥摩目眦俱赤號赤眼歸宗和尚

周靈王生而有髭髯魏崔琰鬚長三尺晉王育鬚長三尺元胡天淵髯長數尺唐李光弼母有鬚數十長五寸許唐高祖太后竇氏生而髮垂過頸梁簡文帝髮垂委地文王四乳宋范鎮之兄鑑四乳鑑子亦四乳南齊王敬則兩腋下生乳各長數寸唐吳元濟山首燕頤垂頤鼻長六寸梁武帝身映日無影老子生而髮盡白元余闕生而髮盡白

古之長壽者伏羲年百九十有四女媧在位百三十年神農年百六十有八黃帝年百十有七少昊年百有一帝嚳年百五歲一云九十三也見路史堯年百一十八歲舜年百有十歲一云百十有一也禹百歲一云百有六湯年百歲見帝王世紀益百八十餘歲伊尹百三十餘歲見宛委編廣成千二百歲見南華經彭祖八百歲見仙傳周太王百二十而沒王季百年而沒見六韜太公望年百三十六歲九十而封齊見說苑召康公年百有八十見路史周公百歲又殷

高宗周穆王享國百年皆出百三十四十歲見王充論衡畢公百餘歲季札亦百歲餘見宛委編漢張蒼百餘歲而卒見史記漢文時有魏文侯樂人竇公年百八十歲見桓譚新論魏武帝時皇甫隆年百餘歲又道人蒯京年百七十八歲見孫真人養性序論晉范長生前後仕凡百年見小史魏鉅鹿張璠百五歲并州刺史送故度遼將軍范明反奴二百五十歲見魏志元魏羅結年百二十歲爲侍中總三十六曹事一百一十始歸老見魏書隱士趙逸年五百歲是晉

武時人正光初來京師見伽藍記梁時鍾離人顧思遠爲散騎侍郎年百二十卒見南史荊州上津鄉人張元始年一百一十六歲又穰城人年二百四十歲不能食穀惟飲曾孫婦乳簡文帝勞以束帛並見梁書開元東封太原人于伯龍年一百二十八歲精爽不衰孫思邈年百餘歲見唐史甄權精究醫術年一百三歲見談賓錄曹憲爲弘文館學士撰文選音義年百餘歲乃卒見唐世說李元爽年一百三十六歲見白居易九老圖序瓊州楊遐舉年八十一與李守

忠見其父曰叔連年一百二十二又見其祖曰宋卿年一百九十五又有九代祖如小兒在雞窠中不知其年見洞微志譙定百三十歲見小說洛陽賣藥党翁年一百七十八見邵伯溫集宋尤時泰嘗舉博學宏詞科年百二十餘歲而終見尤玘萬柳溪邊舊話世有男子雖娶婦而終身無嗣育者謂之天闔世俗則命之曰黃門晉海西公嘗有此疾北齊李庶生而天闔按黃帝鍼經人有具傷於陰陰氣絕而不起陰不能用然其鬚不去宦者之獨去何也岐伯曰宦者

去其宗筋傷其衝脉血寫不復皮膚內結唇口不榮
故鬚不生又大般若經載五種黃門云梵言扇櫛半
釋迦唐言黃門其類有五一日半釋迦總名也有男
根用而不生子二曰伊利沙半釋迦此云妬謂他行
欲卽發不見卽無亦具男根而不生子三曰扇櫛半
釋迦謂本來男根不滿亦不能生子四曰博义半釋
迦謂半月能男半月能女五曰留拿半釋迦此云割
謂被割刑者此五種黃門名爲人中惡趣受身處又
醫書載五不男天犍如變半五不女螺紋角鼓線然

周禮闈人鄭氏註云闈真氣藏者宋趙忠惠帥維揚
日幙僚趙叅議有婢慧黠盡得儕輩之歡趙昵之婢
拒不從疑有異強卽之則男子聞于有司蓋身二形
前後奸狀不一遂寘極刑近李安民嘗於福州得徐
氏處子年十五六交際一再漸具男形蓋天真未破
則彼亦不自知然小說中有池州李氏女及婢添喜
事正相類而此外絕未見於古今傳記等書豈以爲
人妖而汗筆墨不復載乎晉五行志謂之人痾惠帝
時京洛有人兼男女體兩用人道而姓尤淫此亂氣

所生也玉曆通政經男女兩體主國淫亂而二十八宿真形圖所載心房二星皆兩形與丈夫婦人更爲雌雄此又何耶異物志云靈狸一體自爲陰陽故能媚人褚氏遺書曰非男非女之身精血散分又曰感以婦人則男脉應診動以男子則女脉順指皆天地不正之氣也

嘉靖戊申七月邸報云大同右衛叅將馬繼宗家舍人祿之女年十七將嫁化男子余按魏襄王十三年魏有女子化爲丈夫漢末閩中徐登本女子化爲丈夫括異志廣州蕭某女大娘子晉元康中安豐女子周世寧寧康初江陵女唐氏劉聰時內史女人唐光啟二年春郟縣女子宋乾道三年四月永州支氏女慶元三年袁州黃念四女並化爲男客座新聞成化間金齒有人無子止一女以酒肆爲業一日有道人來乞食其女聽道人啖足而去不責其直明日又來如此及二旬女敬禮不衰問其姓我家止兩口臨去謝女曰蒙施多矣耻無爲報有藥一丸奉謝小娘子待嫁日臨行以藥噙口中至夫家嚥下我珍重以此

相報幸勿忽女信而藏之及嫁如其言就寢夫狎之則已化爲男子夫家訟謂女家見誑官追問女備言其故人始異知兩口之言爲呂仙也父母遂得有嗣又蜀王本紀武都丈夫化爲女子蜀王納以爲妃漢建安七年越雋男子劉曜武功男子蘇撫陝男子武長平並化爲女子而漢哀帝建平中豫章有男子化爲女子嫁爲人婦生一子其事尤異

陝西會城正德十三年六月四日初昏時陰黯忽大明有巨人長三丈餘見撫臺東足長四尺許衣袂飄搖鬚髯如叢戟眉目莫辨已而大風雨遂失所在街人王大貴及候更卒並見按春秋敗狄于鹹穀梁傳曰長狄喬如兄弟三人一者之魯一者之齊一者之晉皆殺之身橫九晦長五丈四尺或曰長十丈斷其首而載之眉見于軾史記秦始皇二十六年有大人長五丈足履六尺皆夷狄服凡十二人見于臨洮又史云阮翁仲安南人長二丈三尺爲始皇將兵守臨洮死鑄其像又博物志言臨洮人長三丈五尺曰東北極人長九丈又說得一布衣從海浮出兩袖長二

言明 卷之五 三
丈僬僥氏長三丈晉史元帝咸寧二年八月襄武縣
言有大人見長三丈餘跡長三尺五寸又魏志言咸
熙二年有大人見襄武縣長二丈餘腳跡長二尺二
寸述異記禹會塗山防風氏後至禹誅之其長三丈
其頭專車蜀王本紀秦襄王時宕渠郡獻長人長二
十五丈六尺苻健皇始四年有長人見身長五丈語
百姓張靖曰今當太平俄而不見新平令以聞健以
爲妖妄召靖繫之會大霖雨河渭泛溢蒲津監寇登
于河中流得大履一隻長七尺三寸足跡稱履指長
尺餘文深一寸健歎曰覆載之中何所不有張靖所
見定不虛也乃赦之北齊書盧曹率其徒自薊入海
島得長人骨以髑髏爲馬皂脰長丈六尺以爲二稍
南史陳武帝永定三年有人長三丈見羅浮山通身
潔白衣服楚麗隋書仁壽四年有人長數丈見于應
門其跡長四尺五寸元周致中異域志長人國人長
三四丈國朝有使往遼陽舟被風至其國其人來挈
舟斬其一指大若人臂紀載歷歷豈必都妄又河圖
玉版云龍伯國人長三十丈大秦八長十丈佻人國

長三十丈五尺天之東南西北極各有銅頭鐵額兵
又有金剛敢死力士天中太平之都有都甲食鬼鐵
面兵皆長三千萬丈神異經云西北海外有人焉長
二千里兩脚中間相去千里腹圍一千五百里又東
南隅上大荒之中有樸父焉夫妻並立其高千里腹
圍百輔又云南方有人焉其長七丈腹圍如其長以
朱蛇繞頸以鬼爲食以露爲漿洞冥記云支提國人
長三丈二尺

東方小人國名曰孽長九寸見山海經西北荒中有
小人長七寸朱衣玄冠鶴國男女皆長七寸海鵠吞
之腹中不死見神異經東郡送一短人長七寸曰巨
靈見漢武故事光武時潁川張仲師長二寸寸似當
作尺
見續博物志

文身見汲冢周書蓋周官有墨刑罰五百故曰刀墨
皂巾之民後世謂之曰黥古稱勾吳乃文身斷髮注
以象龍子吳王夫差曰我文身不足以責禮後漢書
南蠻傳雕題注題額也雕之謂刻其肌以丹青涅也
又云哀牢夷皆刻畫其身象龍文衣著尾見風俗通

唐書疏勒人文身碧瞳卽碧眼胡雛也今雲南之羅
鬼夷亦文面又可見文身之俗不止于勾吳也
人有善走者山海經丁靈國人馬蹄善走自鞭其蹄
日行三百里抱朴子杜子微服天門冬八十年日行
三百里趙佗子服桂二十一年毛生日行五百里三
國時虞翻能步行日三百里孫策躍馬翻能隨之魏
楊大眼驍捷跳走如飛以長繩三丈許繫髻而走繩
直如矢馬馳不及隋麥鐵杖日行五百里獨異志云
一夕行一千里五代王進走及奔馬仕至節度使又

有唐彬走及奔鹿又遼陳州有一婦人爲賊帥號白
頸鴉日可行二百里夫曰怪嘗爲之必至賊帥家
今人有運氣逆流采戰之說曰房中術而盲道人遂
以女鼎誘世之好淫者彼家西鄰至爲清淨服食者
所唾棄要之房中自有道非如上所云云也按史周
有房中樂漢書禮樂志高祖時有房中詞樂唐山夫
人所作武帝時有房中歌禮記曾子問喪主人卿大
夫士房中皆哭注房中婦人也漢書藝文志序云房
中者情性之極至道之際是以聖王制外樂以禁內

情而爲之節文樂而有節則和平壽考及迷者弗顧以生疾而殞性命上古修身之道以房中爲首故黃庭經云長生要眇房中急他所紀尤非一端孫思邈千金翼中亦具論之至三丰采戰若旣濟真經等書其說最爲猥鄙其原以爲起于黃帝素女而容成氏彭祖能精行之後東方朔及其妻與列仙傳所言女几左放皆修此道者蓋裁接補益理自非虛然非以道制情築基鍊已工夫已到嘗試爲之必至顛仆老子所謂輕敵者必喪吾寶也項馬仲履天都載闢此說卽弇州亦深以此齷陳上陽之解悟真篇均之未及窮其本趣耳

前代宦者亦有妻石顯傳丞相御史條奏顯舊惡免官與妻子徙歸故郡憂死元魏時御史蕭忻疏云高軒和鸞者闈官之嫠婦胡馬鳴珂者黃門之養息高力士傳河間男子呂玄晤吏京師女國姝力士娶之玄晤擢刀筆吏至少卿李輔國傳帝爲娶元擢女爲其妻擢故以梁長史朱子語類梁師成妻死蘇叔黨范温皆衰經臨哭

娘字俗書也古無之當作孃按說文頻擾也肥大也
從女襄聲女良切其義如此今乃通爲婦女之稱故
子謂母曰娘而世謂穩婆曰老娘女巫曰師娘都下
及江南謂男覲亦曰師娘娼婦曰花娘達旦又謂曰
草娘苗人謂妻曰夫娘南方謂婦人之無行者亦曰
夫娘謂婦人之卑賤者曰某娘曰幾娘鄙之曰婆娘
考之風俗通漢何敞爲鬼蘇珠娘按誅亭長龔壽隋
書韋世康爲絳州刺史與子弟書云况娘春秋已高
溫清宜奉教坊記北齊時丈夫着婦人衣行歌傷人
齊和云踏搖娘南史梁元徐妃與帝左右暨季江私
通季江曰徐娘雖老尚猶多情又梁臨川王宏侵魏
魏遺以巾幘歌曰不畏蕭娘與呂姥但畏合肥有韋
虎謂韋睿呂僧珍也大業拾遺記隋煬帝宮婢曰雅
娘唐史張旭草書見公孫大娘舞劍器而通神又武
承嗣聞喬知之婢窈娘美奪取之杜工部詩耶娘妻
子走相送又黃四娘家花滿蹊白樂天詩吳娘暮雨
蕭蕭曲韋應物詩春風一曲杜韋娘柳子厚下殤女
墓磚記始名和娘樂府雜錄張紅紅唱歌丐於市韋

青納爲姬敬宗召入宮號記曲娘又望江南曲始自
朱崖李太尉鎮浙西日爲姬謝秋娘所製明皇雜錄
呼白鸚鵡爲雪衣娘甘澤謠武三思晚獲一妓曰綺
娘狄仁傑至遂逃壁隙中曰我天上花月之妖也樊
川集杜秋娘金陵女也年十五爲李錡妾錡敗入宮
後坐譴歸故里又竇桂娘父良建中初爲汴州戶曹
掾李希烈破汴州取桂娘去李賀集賀撰申胡子觴
策歌成翔客喜擊觴起立命花娘出幙徘徊拜客劉
賓客集秦娘本章尚書家主謳者河東記唐進士段
何臥病遇妊娘留詩曰妊娘相托不論錢何疾日退
傳奇崔氏鸞鸞婢曰紅娘霍小玉傳長安中有媒氏
鮑十二娘薛蒼駙馬青衣也余媚娘叙錄陸希聲娶
余媚娘媚娘約媒曰陸郎中若必得兒侍巾櫛須立
誓不置側室及女奴圖經蠶神謂之馬頭娘杜陽雜
編南海貢奇女盧媚娘工巧無比麗情集陳敏兄妾
越娘貌美兄死遂與款狎續齊諧記齊穎寓山陰夜
見前宰妾萬文娘墨莊漫錄李后主令宮嬪宵娘以
帛繞脚令纖小右畧舉一二不能悉載是則今之云

云皆有所本然都下自庶人妻以及大官之國夫人
皆曰娘子未嘗有稱夫人郡君等封贈者載考之史
唐柴紹妻平陽公主起兵應李淵與紹各置幕府號
娘子軍開元天寶遺事太真入宮宮中皆號娘子花
蓋夫人宮詞諸院各分娘子位韓昌黎有祭周氏二
十娘子文以此推之古之公主宮妃已與民間共稱
娘子則今之不分尊卑亦自有來矣此陶九儀輟耕
錄所紀也然真娘吳名伎也墓在虎丘山下鄭嵎津
陽門詩迎娘歌喉玉窈窕李昌符詩春娘愛上酒家
樓又孫棨有題妓王福娘墻詩又李章武傳有楊六
娘此里志有牙娘劉泰娘又教坊記上召入賜食因
謂之曰今日娘子不須唱歌又妓裴大娘又張少娘
又竿木家范大娘此皆顯著者而陶不之引何也
南宋蕭齊崇尚佛法閣內夫娘悉令持戒麾下將士
咸使誦經見法琳
辨正論夫娘之稱本此謂夫人娘子蓋是
美稱也是時北則胡后却扇于曇獻南則徐妃贈枕
于瑤光龜茲王女納于鳩摩羅什反以爲榮千金公
主偶于淫毒丐僧不以爲耻後世以夫娘爲惡稱緣

此東坡戲語有和尚宿夫娘相牽正上床云云陶九成乃謂爲罵語蓋未多見六朝雜說耳

國憲家猷論婦人以姓爲稱故周之諸女皆言姬猶宋言子齊言姜也自漢以來不復辨類以爲婦人之名非也史記言高祖居山東好美姬漢書外戚傳云所幸姬戚夫人之類固以失矣注漢書者見其言薄姬虞姬戚姬唐姬等皆妾而非后則又以爲衆妾之稱南朝人士皆謂姬人形之歌咏皆沿習之誤予按稱婦爲姬不獨漢以後如詩陳風曰彼美淑姬可與

晤言非必是姬氏女秦紀呂不韋娶邯鄲姬絕美與居有身亦槩爲婦人稱也

禮五十乃加伯仲白虎通五十知天命思慮定也能順四時長幼之序故以伯仲號之伯長也大也仲中也次也季少也末也風俗通曰氏於字伯仲季是也或稱孟仲季孟亦長也始也或稱伯叔季叔本拾也收拾之也周之有太伯仲雍季歷也魯之有孟孫叔孫季孫也文王時南宮氏之有二伯二仲二叔二季所謂周有八士也然重仲叔而不重伯孟者明長之

不可二也伯夷仲遼而曰叔齊叔卽季也猶叔世曰
季世也伯牛仲弓之稱未必皆五十而後加也

漢孔安國字安國晉安帝名德宗字德宗恭帝名德
文字德文會稽王名道子字道子乃至北史慕容紹
宗馮子琮魏蘭根南史蔡興宗唐孔穎達郭子儀辛
京杲戴休顏張忠尚可孤子孟浩然顏見遠田承嗣田
承緒張嘉貞宇文審李嗣業皆以名爲字也

晉王敦曰可兒司馬高曰羅兒唐白居易曰龜兒謝
靈運曰客兒杜甫長子曰熊兒宋蘇子由子曰虎兒
是皆小字也後賈復稱其子曰大宛兒崔暹曰獺田
兒人稱者漢東方朔曰偷桃小兒金日磾其子曰弄
兒曹操呼孫策曰猗兒呂布呼先主曰大耳兒蜀譙
周曰長兒晉王衍呼裴邈曰白眼兒山濤稱王衍曰
寧馨兒後魏長孫業諸子曰鐵小兒祖瑩曰聖小兒
唐楊儉特曰黃面兒五季李業曰僂儻兒李存信
曰牧羊兒

晉桓嗣曰豹奴王濛曰阿奴石崇曰齊奴潘岳曰檀
奴周謨曰阿奴陳任中曰蠻奴北齊孫騰曰僧奴唐

汝陽王璉曰花奴李林甫曰哥奴皆小字也光武謂
嚴光曰狂奴客謂鄧彪曰守錢奴陸機人罵曰駱奴
明帝人號曰鮮卑奴溫嶠姑女謂嶠爲老奴宋廢帝
稱父武帝曰驕奴後齊古弼帝稱曰筆頭奴唐顏杲
卿罵安祿山曰牧羊羯奴宋梅聖俞呼謝師直曰錦
衣奴

昔人有父字其子者曹丞相操每下教稱子桓右軍
與人書謂子敬飛白大有勢子字其父者胡母謙之
見父輔之暑月搖扇視事呼之曰彥國胡爲自貽伊
憾從子字其叔父者袁種謂益曰南方卑濕絲能日
飲亡何說王母反而已有臣字其君者光武幸章陵
宗室諸母酣悅相謂曰文叔少時謹信與人不欵曲
惟直柔耳今乃能如此

諱名起于周人秦漢沿而用之廟諱甚嚴而祀文王
之頌曰克昌厥後是廟諱不嫌也一名者諱而漢韋
孟之詩曰總齊羣邦以翼大商犯高祖諱是獨諱不
嫌也子宜諱其父而曹志爲植子上奏武帝曰榦植
不強是父諱不嫌也臣宜諱其君孫權有吳時張承

與呂岱書云功以權成是君諱不嫌也

柳少師與弟帖末云誠懸呈人多疑之以顏籀注漢書丞相衡傳云字以表德豈人所自稱柳不當稱字然觀逸少敬謝帖自云王逸少白廬山遠公集盧循與遠書云范陽盧子先叩頭則古人稱字蓋或有之矣

古人致書于人亦有不稱名而稱君者如徐陵與王僧辯書稱孤子徐君頓首與周處士書末亦云徐君白文苑英華注云君疑是古人自稱如王績書中亦作王君然則古人或有如此體未可知也

周寶蘇鍾銘曰走作朕皇祖文考寶蘇鍾走其萬年子子孫孫永寶用享走之名于經傳無見蓋昔人自以稱謂猶孤寡不穀臣僕愚鄙皆謙損之辭故司馬遷自稱曰太史公牛馬走班固自稱曰走亦不任厠技於彼列然則走之號非獨始於漢蓋亦上矣

余讀屈原書以朕自居周秦六國間凡人相與言皆自臣也他如左氏書子皮卽位叔向言罕樂得其國葉公作顧命張永謂其父柩大行屆道孫盛謂父登

言明 卷之五
遐蕭惠開語劉成具如慈旨竟陵語顧憲之曰非君
無以聞此德音鮑照於始興王則謂不足宣贊聖旨
後世禁忌日嚴此等稱遂絕矣

父命得爲救後漢樊重焚券諸子從救是也母亦可
稱大人前漢淮陽獻王傳張博云王遇大人亦解後
漢范滂就誅與母訣曰大人割不忍之恩勿增感感
是也叔可稱大人踈受對踈廣云從大人議是也父
可以稱聖善楊修答曹植書有聖善之教注謂武帝
也人臣不嫌稱萬歲馬援傳醜酒享軍士皆伏稱萬

歲也上父母壽可稱萬壽潘岳閒居賦稱萬壽以獻
觴是也屋之高嚴通謂之殿前漢霍光傳鴟鳴殿前
樹上黃霸傳郡國上計長吏一輩先上殿是也白事
丞相亦可謂之奏事魏相傳帶劔奏事是也造謁人
亦可謂之朝司馬相如傳臨邛今日往朝相如是也
人臣得言垂拱薛宣自言垂拱蒙成是也人臣得言
端拱謝孚言端拱嘯咏謝鯤言端拱廟堂是也人臣
得言諒闇山濤傳武帝詔云山太常雖居諒闇是也
人臣得稱聖君賢君晉曹摅一縣號曰聖君薛宣傳

屬縣各得賢君是也男子無妻亦稱寡左傳曰崔杼
生成及彊而寡是也
君稱寡人而凡人亦可稱王右軍論字假令寡人耽
之若此婦人亦可稱寡人詩邶風莊姜云以勗寡人
婦人稱夫曰良人而君子亦可稱黃鳥之詩曰殲我
良人莊子文王曰昔者寡人夢見良人黑色而顛晉
庾翼疏臣所以輒發良人不顧怨咎呂氏紀良人請
問十二紀是也

王楸野客叢書引緇素雜記云歐陽永叔代王狀元
謝啟陸機閱史尚靡識于撐犁枚臯屬文徒自成於
骹跛沈元用啟讀撐犁而靡識敢謂知書問祈招而
不知尚慙寡學陸機不識撐犁事竟不知載何書及
見玄晏春秋曰子讀匈奴傳不識撐犁孤塗之事有
胡奴執燭顧而問之奴曰撐犁天子也言匈奴號撐
犁猶漢人稱天子也於是曠然發寤其事亦著藝文
類聚類要諸書然則謂不識撐犁者乃皇甫謐非陸
機也歐公謂陸機應別有所據耳按杜氏通典云匈
奴謂天爲撐犁謂子爲孤塗然則言撐犁天子者得

其語而猶未詳也

今人謂丈人爲太山或者謂太山有丈人峯故云據雜俎明皇東封以張說爲封禪使及事已三公以下皆轉一品說以壻鄭鎰官九品因說遷五品玄宗怪而問之鎰不能對黃番綽對曰太山之力也與前說不同又按陳後山送外舅詩丈人東南英注謂丈人字俗以爲丈人之稱然字則遠矣按三國志裴松之注獻帝舅車騎將軍董下謂古無丈人之名故謂之舅松之宋元嘉時人呼婦翁爲丈人已見此時矣

今人以居士自號者甚多考之六經中惟禮記玉藻有曰居士錦帶注謂道藝處士也吳曾能改齋漫錄云居士之號起於商周之時按韓非子書曰太公封於齊東海上有居士任喬華士昆弟二人立議曰吾不臣天子不友諸侯耕而食之掘而飲之吾無求於人無上之名無君之祿不仕而事力云然則居士之名故自古也

祭義曰明命鬼神以爲黔首則內經曰黔首共飲食莫知之也李斯刻石頌秦德曰黔首康定太史公因

此語遂於秦記謂秦名民曰黔首朱子註孟子亦曰周言黎民秦言黔首蓋因太史公之語也然祭義內經之書實先秦世黔首之稱古矣恐有不因秦也或古不以稱民秦必以稱民故太史公云然耳今人謂賤丈夫曰漢子按北齊魏愷自散騎常侍遷青州長史固辭文宣帝大怒曰何物漢子與官不就又段成式廬陵官下記韋令去西蜀時彭州刺史被縣令密論訴韋前期勘知屈刺史詣府陳謝及迴日諸縣令悉遠迎所訴者爲首大言曰使君今日可謂朱研益冊矣刺史笑曰則公便是研朱漢子也

凡婢役於婢者俗謂之重臺按左氏傳昭公五年日之數十故有十時亦當十位自王以下其二爲公其三爲卿注云日中爲王食時爲公平旦爲卿雞鳴爲士夜半爲皂人定爲輿黃昏爲隸日入爲僚晡時爲僕日昃爲臺禺中日出闕不在第王公曠其位又昭公七年天有十日人有十等故王臣公公臣大夫大夫臣士士臣皂皂臣輿輿臣臺則所謂臺者十等之至卑今豈亦本是與然加以重字尤有意也

古樂府有邯鄲才人嫁爲廝養卒婦前漢書張耳傳
廝養卒注蘇林曰廝取薪者也養養人者也又云乃
歸趙王養卒爲御而歸左傳莊王伐鄭廝役扈養死
者數百人注養馬者曰扈炊烹者曰養則廝養卒當
作廝扈卒爲是也

隨筆云今呼蒼頭爲將軍其事本彭寵爲奴所縛謂
妻曰趣爲將軍治裝注呼奴爲將軍欲其赦已也此
說固是然觀陳勝傳將軍呂臣爲蒼頭軍是則語蒼
頭爲將軍亦已久矣又衛青爲奴後爲大將軍唐至

德後官爵虛濫大將軍告身纔易一醉至有朝士僮
僕衣金紫而身執賤役者故岑參歌曰紫紱金章左
右趨問著卽是蒼頭奴李商隱詩曰廝養爲將軍則
知蒼頭奴爲將軍事甚多又按前漢鮑宣傳蒼頭廬
兒注漢名奴爲蒼頭知此名起於漢矣觀後漢注秦
人呼爲黔首謂奴爲蒼頭者以別於良人又知蒼頭
之名自秦已然又讀戰國策魏有蒼頭軍三十萬又
知蒼頭之名不但秦也

越絕糧告糶于吳使素忠爲信晉武帝災報帖末云

故遣信還南史晨起出陌頭屬與信會古者謂使者
曰信真誥云公至山下又遣一信見告謝宣城傳云
荊州信去倚待陶隱居帖云明旦信還仍過取反虞
永興帖云事以信人口具凡言信者皆謂使者也今
人流俗遂以遣書饋物爲信故謂之書信而謂前人
之語亦然謬矣王右軍十七帖有云往得其書信遂
不取答謂昔嘗得其來書而信人竟不取回書耳而
世俗遂誤讀往得其書信爲一句遂不取答爲一句
誤矣古樂府云有信數寄書無信心相憶莫作瓶墜
井一去無消息包佶詩去札頻逢信迴帆早挂空此
二詩尤可證也

韓退之上詩云衙時龍戶集上日馬人來吳垞云長
安有龍戶見水卽知有龍或引出但如鯁魚按此是
潮州時上廣帥詐非長安也馬人程大昌演繁露引
傳燈錄毗奢利王時其國有一類人如馬裸露王運
神力分身爲蠶彼乃得衣王復生中印度馬人感戀
悲號以爲入中國而上日有馬人恐亦非也按俞益
期牋云馬文淵立銅柱岸北出有遺兵十餘家居壽

言明 卷之五
洽岸南對銅柱悉姓馬婚姻至今二百餘家言語飲食尚與中華同號曰馬留恐此亦是馬留之類耳又記得一小說龍戶在儋耳珠崖其人目睛皆青碧入水能伏一二日蓋卽所謂崑崙奴也

每見人稱前導者伍伯晉書賈充戲庾純云君行常在入前今何以後蓋純之先人有爲伍伯者按古今注云一伍之長也五人爲伍曰伍伯一曰戶伯漢制兵吏五人一戶一竈每竈四直一伯故曰戶伯又曰大伯諸王公行戶服赤幘纁衣韋鞮率其伍以導引也

患說文憂也从心上串串亦聲也徐曰患之言貫也貫于心也又病也慮也惡也苦也禍也恙說文亦曰憂也从心羊聲一曰蟲入腹食人心古者草居多被此毒故相問無恙神異經北方有獸曰獐獐恙也黃帝殺之由是人無憂疾謂之無恙通志無患子曰噤婁曰桓其子勻圓如漆今人貫爲數珠纂文曰無恙木名也實可以去垢核黑如漆古今注云程雅問櫨木曰無患何也答曰昔有神巫曰淫眊能符劾百鬼

說略 卷之五
得鬼則以此木爲棒棒殺之世人相傳以爲器用厭
鬼故曰無患齊卞敬家有無患枕贊然則恙之與患
一爲虫而一爲木也

世人瘧疾將作謂可避之他所閭巷不經之說也然
自唐已然高力士流巫州李輔國授謫制時力士方
避瘧功臣閣下杜子美詩三年猶瘧疾一鬼不銷亡
隔日搜脂髓增寒抱雪霜徒然潛隙地有覩屢鮮粧
則不特避之而且塗抹其面矣

周官醫疾四時皆有癘疾春時有瘖首疾鄭注瘖酸
削也司馬相如消渴則所謂消中之疾也瘖首消中
二疾異而其字亦自不同後漢李通素有消疾此正
如相如渴疾也太子賢注消中之疾是已乃復引周
官爲証是以瘖首消中爲一義以至玉篇廣韻皆以
瘖爲消病惟禮部韻瘖字下注酸瘖頭痛是爲得之
張孟楫韻注酸瘖頭痛又渴病雖明知二疾爲不同
是認二字爲一體矣

婦人之脉惟以尺脉之常盛常弱與男子爲相反而
脉訣謂反此背看及觀褚澄尊生經曰脉分兩手手

分三部隔尺寸者命之曰關去寸度尺曰尺關前一寸爲寸左手之寸極上右手之尺極下男子陽順自下生上故極下之地右手之尺爲受命之根本如天地未分元氣混沌也既受命矣萬物從土而出惟脾爲先故右手尺上之關爲脾脾土生金故關上之寸爲肺肺金生水故右手之寸越左手之尺爲腎腎水生木故左手尺上之關爲肝肝水生火故關上之寸爲心女子陰逆自上生下故極上之地左手之寸爲受命之根本如天地未分元氣混沌也既受命矣萬物從土而出惟脾爲先故左手寸下之關爲脾脾土生金故關下之尺爲肺肺金生水故左手之尺越右手之寸爲腎腎水生木故右手寸下之關爲肝肝木生火故關下之寸爲心男子右手尺脉常弱初生微眇之氣也女子右手尺脉常強心火之位也非男非女之身感以婦人則男脉應診動以男子則女脉順指不察乎此難與言醫褚澄尚主爲劉宋駙馬都尉察脉如神著書十篇曰尊生秘經此其一也夷門廣牘有朱彥修怪痾單一書非朱作也所紀怪

言明 卷之五
證多端然憶往記中有尤異者因略筆之魏時一女
子美麗不嫁右膝常患一瘡膿水不絕華佗使人乘
馬牽一栗色狗走三十里歸而熱截右足柱瘡上俄
有一赤虵從瘡出入犬足中疾遂平見佗別傳漢末
有人得心腹癥病晝夜切痛臨終勅其子曰氣絕後
可剖視之子不忍違言得一銅鎗容數合許後華佗
出巾箱中藥以投鎗鎗卽成酒焉見志怪宋明帝宮
人患腰痛牽心發卽氣絕徐文伯曰此髮癥也以油
灌之吐物如髮稍稍引之長三尺頭已成蛇能動懸
柱上水滴盡一髮而已見談數有人患脚跟痛醫莫
能識徐之才曰蛤精疾也當由乘船入海垂脚水中
割之得蛤子二個如榆莢見太原故事洛中有士人
患應病語卽喉中應之張文仲令取本草讀之皆應
至雷丸卽無聲和爲丸吞之卽止見朝野僉載有一
少年眼中常見一小鏡子醫工趙卿診之與少年期
來日以魚鱠奉候及少年赴之坐久止施一甌芥醋
卿故久不出少年饑甚且聞醋香啜之至盡眼花豁
然卿乃出語少年曰郎君因吃鱠太多有魚鱗在胸

言明 卷之五 三六
中故也見北夢瑣言永徽中有崔爽者每食生魚三
斗乃足後饑作鱠未成忍饑不禁遂吐一物狀如蝦
蟄自此之後不復能食鱠矣見朝野僉載大曆中和
州劉錄事食兼數人尤能食鱠常言鱠味未能果腹
客乃網魚百斤會于野庭觀其下筋劉初食鱠數楮
忽似小哽因殼出一骨珠子大如豆乃寘于茶甌中
以楮覆之食未半甌楮傾側舉視之骨珠子已長數
寸如人狀客兢觀之隨視而長頃刻長及人遂粹劉
因相歐流血良久各散走一循廳西一循廳左俱及
後門相觸而翕成一人乃劉也神已癡矣半日方能
語訪其所以皆不省之劉自是惡鱠見酉陽雜俎句
容佐史能啖鱠至數十斤恒不飽縣令聞其善啖乃
出百斤史快食至盡因覺氣悶久之吐出一物狀如
麻鞋底以置鱠中鱠卽成水後有胡人買之云此是
銷魚之精亦能銷腹中塊病有病者以一片如指端
繩繫之置病處其塊卽消見廣異記伶人才俊朝妻
項瘦者初微若雞卵漸巨如三四升甕盎積五年大
如數斛之鼎其中有琴瑟笙磬埙篪之響數年瘦外

生小冗如針芒不知幾億每天欲雨則穴中吹白烟
霏霏如絲縷漸高布散結爲屯雲雨則立降俊朝磨
淬利刃將剖決之瘦中軒然有聲遂四分披裂有一
大獠跳躍而去後卒愈見續玄怪錄天寶中隴西李
生病左乳痛不可忍一日癰潰有一雉自乳中突而
飛出不知所止見宣室志大曆中邛州城將魏淑膚
體洪壯年方四十忽中異疾無所酸苦但飲食日損
身體日消寒暑未周卽如嬰孩不復能行坐語言其
母與妻更相提抱復遇生日妻以釵股挾食以哺須
臾盡一小甌自是日加所食身亦漸長不半歲乃復
其初見集異記皇甫及者咸通壬辰年十四矣忽暴
長逾時而身越七尺帶兼數圍長啜大嚼三倍于昔
明年秋無疾而逝見三水小牘李言吉左目上臉忽
痒而生一小瘡漸長大如鴨卵恒壓其眼不能開其
舅金州防禦使崔堯封飲言吉酒大醉遂割去之言
吉不知覺也贅旣破中有黃雀鳴噪而去見聞奇錄
處士蒯亮言其所知額角患瘤醫爲割之得一黑石
碁子巨斧擊之終不傷缺復有足脛生瘤者因至親

家爲獬犬所齧正齧其痛其中得針百餘枚皆可用
疾亦愈見稽神錄呂縉叔以知制誥知揚州忽得疾
但縮小臨終僅如小兒松滋令姜愚無它疾忽不識
字數年方稍稍復舊又有一人家妾視直物皆曲弓
弦界尺之類視之皆如鈎醫僧奉真親見之江南逆
旅中一老婦啖物不知飽徐德占過逆旅老婦慙饑
其子耻之對德占以蒸餅啖之盡一竹簣約百餅猫
稱饑不已日飯一石米隨即痢之饑復如故醴泉主
簿蔡繩有美行博學有文亦得饑疾每饑立須啖物
稍遲則頓仆悶絕懷中常置餅餌雖對貴客遇饑亦
便齧啖以上見夢溪筆談有人飲茗至一斛二斗忽
飲量過數升吐出一物如牛肺以茗澆之容一斛二
斗因名曰斛二瘕見續搜神記陳子直主簿妻有異
疾每腹脹則腹中有聲如擊鼓遠聞于外行人過門
者皆疑其家作樂也腹脹消則鼓聲亦止一月一作
醫莫能名其疾見宋張季明醫說傳舍人忽得腸癢
之疾至劇時往往對衆失笑吃吃不止此疾古人所
未有見遜齋閒覽興國初有任氏美色聘進士王公

甫因公甫不遂寸祿愁鬱面漸變黑自慙而歸母家
求醫後遇道人以黃丹女萎二物爲末以酒下二錢
日二服面微微白一月如舊見名醫錄

漢末關中大亂有發前漢時冢女人猶活既出如舊
魏郭后愛念之錄置宮內常置左右問漢時宮中事
說之了了皆有次序後后崩哭泣過禮遂死焉漢末
發范明友冢奴猶活明友霍光女聳說光家事多與
漢書相似大司馬曹休所統中郎將謝璋部曲義兵
奚儂恩女年四歲病死埋葬五日復生見博物志晉

元康中梁國女子許嫁而夫戍經年不歸女家強以
適人尋病亡夫還問女所在夫徑至墓開棺女遂活
與俱歸後壻詣官爭之王導曰此非常事不可以常
理斷之宜歸前夫惠帝世杜錫家葬婢誤不得出後
十年開冢附葬而婢尚生初婢之埋年十五六及開
冢更生猶十五六嫁之有子又魏太和中太原人破
棺得一生婦視其墓木可三十歲見續博物志于寶
父葬婢閉墓中後附葬開冢婢猶活言其父常以飲
食詒婢與寢處如平生寶因此作搜神記顏含兄畿

言明 卷之五
死于醫家迎喪引者顛仆言畿不死但服藥傷五臟
耳開棺氣息甚微飲食所須託之以夢含侍養不出
戶者十三年畿乃死又漢獻帝初平中長沙有人姓
桓氏既死棺斂月餘母聞有聲出之遂生見集異志
又建安四年武陵女子李娥死斂埋十四日有聲開
棺遂活見後漢五行志南陽縣民蘇調女死三年自
開棺還家言大將軍事赤小荳黃荳死有持此荳一
石者無復作告又言可用梓木爲棺見酉陽雜俎

說略卷之五

終

說略卷之六

江寧顧起元太初輯

官儀

古官之名伏羲以龍紀爲龍師龍名春官青龍夏官
赤龍秋官白龍冬官黑龍中官黃龍又設九庖之官
共工以水紀爲水師水名神農以火紀爲火師火名
春官大火夏官鶉火秋官西火冬官北火中官中火
黃帝雲師雲名春官青雲夏官赤雲秋官白雲冬官
黑雲中官黃雲置六相曰當天曰常平曰士師曰司

徒曰司馬曰李立四監置四史置五官曰天曰地曰神曰祇曰物一曰士師行人司徒祝宗使人置大醫樂師少昊摯以鳥紀爲鳥師鳥名曰鳳鳥氏玄鳥氏伯趙氏青鳥氏丹鳥氏祝鳩氏睢鳩氏鳴鳩氏爽鳩氏鷓鴣氏又五雉爲五工正九扈爲九農正顓帝置五行之官春官木正曰勾芒夏官火正曰祝融秋官金正曰蓐收冬官水正曰玄冥中官土正曰后土唐制百揆四岳州牧侯伯置謁者射官弓正虞置九官曰司空曰后稷曰司徒曰士曰共工曰虞曰秩宗曰典樂曰納言夏后氏置六卿又有三公九卿二十七大夫八十一元士商制曰大宰大宗大史大祝大士大卜曰司徒司馬司空司士司寇曰司士司木司水司草司器司貨曰土工金工石工木工獸工草工又五官之長曰伯又設方伯五國以爲屬屬有長十國以爲連連有帥三十國以爲率率有正二百一十國以爲州州有伯八州八伯五十六正百六十八帥三百三十六長八伯各以其屬屬於天子之老二人分天下以爲左右曰二伯周官有成書不具載

古官員之數唐虞尚書曰一百員鄭玄云六十員夏尚書曰倍唐虞則二百鄭玄曰百二十員殷明堂位曰二百鄭玄曰二百四十周内二千六百四十三員外六萬一千三十三人前漢十三萬二百八十五員後漢七千五百六十七員晉六千八百三十六員宋六千一百七十二員齊二千一百二員後魏七千七百六十四員北齊二千三百二十二員並內官後周二千九百八十九員並內官隋內官二千五百八十一外官九千五百九十五唐內二千二百六十外一萬六千一百八十五宋景德一萬員皇祐治平二萬四千員紹熙三萬二千一十六員慶元四萬二千有奇嘉泰三萬七千八百餘員

漢之職官太尉卽今之本兵左右前後將軍卽今之五府其各置長史卽今之參軍大夫太中大夫中大夫諫大夫卽今之六科期門卽今之錦衣廷尉卽今之大理治粟內史卽今之戶部少府掌山海地澤之稅卽工部之都水虞衡尚書符節卽今之尚寶太醫卽太醫院導官卽今儀仗司樂府卽今太常諸屬考

工室即今工部鐵作局與內官監諸屬大官即今之
 清膳司與內之御膳監東織西織即今之織染局而
 庖人以下又與光祿寺大官諸司相參矣典客掌歸
 義蠻夷一名大行今國家設行人專以使四方歸義
 蠻夷則以屬禮部之主客司郎中令中書謁者以下
 今茲為內官諸屬矣導官乃擇米者云
 即今儀仗司恐誤
 今之官名聊疏其始太師太傅太保少師少傅少保
 周成王置也給事中秦置也知起居注漢武帝禁中
 官也中書舍人漢有之學士北齊文林館學士昉也

翰林待詔玄宗置也其改稱翰林學士掌內命唐制
 也其掌制誥赦勅國書及宮禁所用之文辭宋制也
 光學之重自宋始侍讀後魏有之開元三年命馬懷
 素褚無量更日侍讀其建侍讀學士則十三年置集
 賢院始稱翰林侍讀學士宋咸平二年始也侍講自
 漢顯宗朝張酺靈帝楊泗始其帶學士亦自開元十
 三年始稱翰林侍講學士亦宋制也經筵官自隆興
 改元昉大學士宋集賢院始也修撰檢討其事久遠
 矣而立員宋制也編修自宋慶曆中編修例冊始其

言明 卷之六
殿學士大學士後唐天成端明殿學士宋初觀文殿
大學士昉也閣學士宋制也典簿典籍司直元更制
也東宮官太子太師太子太傅太子太保殷周已有
之其三少漢有少傅而備三則魏制也太子賓客自
唐顯慶始也詹事秦官開府置官屬自齊始詹事少
詹事唐所官其庶子洗馬漢制也置坊自北齊始左
右二春坊唐置府例也中允諭德贊善錄事等官並
唐府屬也主簿晉始制也正字齊祕書省始有之尚
書秦官侍郎秦黃門侍郎其貳六曹則隋煬置也郎
中秦官員外自晉太始中散騎常侍昉其稱員外郎
隋開皇中始主事隋所置御史之名周官有之掌贊
書授法令非後世任也秦漢始爲糾察之任稱監察
御史隋改檢校御史爲之曰察院開元八年置也太
常漢更秦奉常爲之其置卿少卿丞北齊也其主簿
博士奉禮郎協律郎唐神龍初昉也光祿漢太初中
名卿自梁始少卿自魏始也大官珍羞良醞掌醢四
署署丞唐神龍初置主簿宋元豐始也太僕周官卿
少卿北齊置也其屬有丞主簿唐神龍初署也大理

古李官秦官名廷尉景帝中元六年更今名有卿其
置少卿北齊昉丞正評事唐神龍初始也鴻臚漢太
初始更名後漢大鴻臚卿有寺少卿自北齊置其置
署名司儀隋開皇十二年也其置丞漢劉德始爲之
主簿則漢官儀鴻臚駕四馬主簿也國子監祭酒孫
卿在齊二爲祭酒置國子祭酒晉武帝咸寧四年也
司業隋煬帝大業三年置監丞隋置助教咸寧四年
置博士秦官也五經博士漢武建元五年置學正見
禮記王制學教授唐府郡置也司曆保章正靈臺郎
挈壺正等官唐乾元元年始五官正宋制也游擊前
漢以來將軍有之指揮都指揮使唐長興前有之大
將軍戰國時官都督自魏文帝以大將軍曹真都督
中外諸軍始元帥唐制始也宣撫使唐元和中戶部
侍郎楊於陵始監軍齊莊賈監穰苴昉也駙馬都尉
漢元鼎中置其專爲尚公主者官自宋齊梁陳昉也
巡檢宋有之留守漢和帝南巡祠園廟以張禹兼衛
留守其昉也運使唐先天二年李傑爲水陸發運使
運使名自此始提舉漢耿壽昌常平之任也經略貞

觀邊州別置提刑按察司宋初置副使僉事經歷知
事照磨元大德後例也都轉鹽運使司宋初立其同
副判經歷知照至元中始也京尹漢太初更內史名
之治中漢官名判官唐天寶後有之推官長興中始
見於史知府知州知縣宋以來有之也

國朝文資四十六階第一階特進光祿大夫上柱國
是正一品加贈資凡加贈資不實授特進光祿大夫
並漢官名柱國楚官名第二階特進光祿大夫是正
一品陞授資第三階特進榮祿大夫是正一品初授

資榮祿因元舊資銜第四階光祿大夫柱國是從一
品加贈資第五階光祿大夫是從一品陞授資第六
階榮祿大夫是從一品初授資第七階資德大夫正
治上卿是正二品加贈資第八階資政大夫是正二
品陞授資第九階資善大夫是正二品初授資資德
資政資善三銜並因元舊制惟正治上卿爲新設第
十階正奉大夫正治卿是從二品加贈資十一階通
奉大夫是從二品陞授資十二階中奉大夫是從二
品初授資正奉通奉中奉三銜並因宋大觀舊制惟

正治卿爲新設十三階正議大夫資治尹是正三品
加贈資十四階通議大夫是正三品陞授資十五階
嘉議大夫是正三品初授資正議通議二銜並因隋
舊嘉議則因元制惟資治尹爲新設十六階大中大
夫資治少尹是從三品加贈資十七階大中大夫是
從三品陞授資十八階亞中大夫是從三品初授資
大中大夫資銜並因唐制亞中大夫則因元舊制資
銜惟資治少尹爲新設十九階中議大夫贊治尹是
正四品加贈資二十階中憲大夫是正四品陞授資
二十一階中順大夫是正四品初授資中議中憲中
順資銜並同元舊制惟贊治尹爲新設二十二階朝
請大夫贊治少尹是從四品加贈資二十三階朝議
大夫是從四品陞授資二十四階朝列大夫是從四
品初授資朝請朝議資銜並同隋舊朝列則因元舊
資銜惟贊治少尹爲新設二十五階奉政大夫修正
庶尹是正五品加贈資二十六階奉政大夫是正五
品陞授資二十七階奉議大夫是正五品初授資奉
政奉議資銜並因元舊惟修正庶尹爲新設二十八

階奉直大夫協正庶尹是從五品加贈資二十九階
奉直大夫是從五品陞授資三十階奉訓大夫是從
五品初授資奉直因宋舊資銜奉訓因元舊資銜惟
協正庶尹爲新設三十一階承德郎是正六品陞授
資因元舊制三十二階承直郎是正六品初授資因
宋舊銜三十三階儒林郎是從六品陞授資因唐舊
制銜三十四階承務郎是從六品初授資因宋舊銜
三十五階文林郎是正七品陞授資因唐舊銜三十
六階承事郎是正七品初授資因隋舊制三十七階
徵仕郎是從七品陞授資改隋徵事之銜作徵仕郎
三十八階從仕郎是從七品初授資亦改從事之銜
爲從仕也三十九階修職郎是正八品陞授資四十
階迪功郎是正八品初授資並因宋舊銜四十一階
修職佐郎是從八品陞授資四十二階迪功佐郎是
從八品初授資並係新設四十三階登仕郎是正九
品陞授資四十四階將仕郎是正九品初授資並因
唐舊銜四十五階登仕佐郎是從九品陞授資四十
六階將仕佐郎是從九品初授資因元舊銜內上柱

言明
卷之六
九
國等皆勲級也

武階四十四其正從一品六階並與文階同正二品
初授驃騎將軍自漢霍去病始唐宋爲從一品階陞
授金吾將軍加授龍虎將軍勲上護軍因元舊也從
二品初授鎮國將軍陞授定國將軍加授奉國將軍
護軍皆元舊止改輔國爲定國以上六階元皆有上
字正三品初授昭勇將軍陞授昭義將軍加授昭武
將軍上輕車都尉皆元舊止以陞授爲初授耳昭武
唐爲校尉正六品上階從三品初授懷遠將軍加授

定遠將軍宋正五上階陞授安遠將軍輕車都尉皆
元舊也上六階元皆有上字定遠是唐正五品銜護
軍漢初陳平爲之韓安國爲護軍將軍都尉漢官名
輕車輕去聲漢李蔡公孫賀皆爲輕車將軍也正四
品初授明威將軍陞授宣威將軍加授廣威將軍騎
都尉皆元舊宣威唐宋從四品上階明威唐宋從四
品下階也從四品初授宣武將軍陞授顯武將軍加
授信武將軍騎都尉皆元舊正五品初授武德將軍
陞授武節將軍皆元舊加驍騎尉漢李廣爲驍騎將

言明
卷之六
軍又齊受李廣爲驍騎都尉從五品初授武略將軍
陞授武毅將軍皆元舊加飛騎尉正六品初授昭信
校尉陞授承信校尉皆元舊加雲騎尉從六品初授
忠顯校尉陞授忠武校尉皆元舊加武騎尉漢司馬
相如爲武騎常侍梁丘賀爲武騎郎正七品初授忠
翊校尉陞授忠勇校尉從七品初授敦武校尉陞授
修武校尉正八品初授進義校尉陞授保義校尉從
八品初授進義副尉陞授保義副尉皆元舊副尉唐
宋階有之

漢列侯不與政而勲重者位特進後以大將軍鄧騭
辭位加同三司之儀以後得開府辟僚屬又與三公
俱開黃閣故曰開府儀同三司羊征南位開府謙讓
不肯辟召是也魏晉之際太保王祥以睢陵公太保
衛瓘以蘭陵公司徒魏舒以劇陽子老就第太保同
保傅司徒同三司亦此意但不入官耳晉宋齊梁陳
俱不輕授北魏爾朱世隆辭太保加同三司在三公
上後周及隋改爲勲官在柱國下有三等曰上開府
曰開府曰儀同至唐而始復故文皇之世唯尉遲敬

德辭都督乃得加之位次房司空以後復爲階官之
最其次特進 國初亦因之然官至太尉司徒司空
而曰儀同三司名實抑何舛也 國初去開府儀同
以特進光祿大夫冠正一品是矣然以公卿而稱大
夫如尚書再滿考階曰資德大夫勳曰正治上卿其
勳階亦自相矛盾矣

相國丞相皆秦官秉政者太師太傅太保古三公後
以爲三師位上公以太尉司徒司空爲三公故也相
國自呂不韋蕭曹後罷不設至司馬昭父子以此篡
魏後遂因之東漢有三公而無丞相曹操父子以此
篡漢亦遂少置渡江之後惟王導會稽王昱以序遷
者三師惟太師爲尊魏避司馬師諱改爲太宰高齊
並置而以太宰位太師上左右丞相位太宰上然董
卓以相國遷太師孔光以丞相宇文泰以大丞相遷
太師大冢宰則又以太師爲尊也元帥卽漢太尉晉
都督中外諸軍職也金爲都元帥權甚重而位在三
公丞相下元則至輕僅若今之指揮使耳至加以天
下爲稱則亦非人臣所宜當也

官制曰冢宰之職自漢以來分裂四出不可收拾宰相之職分而爲尚書中書後來收拾不得遂爲尚書中書省宮正宮伯之職分而爲光祿勳衛尉後來收拾不得遂成門下省自膳夫至腊人凡鳥獸魚鱉烹庖之事自酒正至掌次凡酒漿醢醢幕幄之事分入少府自醫師至獸醫分入太常亦入少府自太府而下至掌皮內一項則分入少府外一項則分入大司農自內宰至司服以下凡宮中使令之人分入大長秋只冢宰一官自分而爲六矣宋朝則自膳夫庖人而下盡收入御前供奉官自醫師食醫而下盡收入御藥院自宮人掌舍而下盡收入修內司自玉府內府而下盡收入內藏庫

翰林之設前代隆重其選今以唐宋兩朝舊事略紀之一職制唐制乘輿所在必有文詞經學之士以備宴見而顧問而文書詔令則以中書舍人主之自太宗時名儒學士時召以草制未有名號至乾封以後始號北門學士玄宗初翰林待詔掌四方表疏批答又以中書務劇乃選文學之士號翰林供奉掌制誥

開元末又改供奉為學士別置院專掌內命其後選用益重而禮遇益親至號內相又以為天子私人

韋執

誼翰林志

唐憲宗始命鄭絪為承旨居諸學士上居東第

一閣凡大詔令凡上所甚注意莫不專授

元稹翰林承旨記

宋翰林學士謂之內制中書舍人謂之外制其後并

雜學士待制通謂之兩制

事實

至德後天子召集賢學

士於禁中草書詔雖宸翰所揮亦資其檢討謂之視

草

翰林志

翰林學士掌內制制誥赦勅國書及官禁所

用之文辭凡后妃親王公主宰相節度使除拜則學

士草詞授待詔書訖以進赦降德音則先進草大詔

命及外國書則具本稟奏得畫亦如之凡拜宰相或

事重者則宣召面諭旨給筆札書所得旨稟奏歸院

具詞以進餘遣內侍授中書省熟狀亦如之若已畫

旨而有未盡則論奏貼正乘輿行幸則侍從以備顧

問有所獻納則請對或奏對凡初命為學士皆遣使

就第宣詔旨召入院

宋續會要

學士所著撰拜免公王將

相妃主曰制賞賜恩宥曰赦書曰德音處分事曰勅

曰御札五品以上曰詔六品以下曰勅批羣臣表曰

批答獎勲勞曰獎諭賜外國曰蕃書醮曰青詞曰密
詞釋曰齋文教坊致語曰白話土木興建曰上梁文
宣賜曰口宣此外有祝文祭文碑銘神道碑樂章詩
頌春帖子之類撰訖進入故事遇有除拜以雙日鎖
院隻日降麻故學士以雙日至萬花谷郊裡行慶制命
填委必聚廳分草之蘇易簡續翰林志一印信晉開運中賜
學士院書詔金印一翰林志宋翰苑印以翰林學士院
印六字爲文背鐫景德二年少傅監鑄上兩字微刻
南渡後百司印無如此久者周必大玉堂雜記一官署開元

二十六年別建學士院於翰林院之南俾掌內命

韋執

誼翰林志及翰
林故事

元和以後院長一人別勅承旨居北壁

之東閣故事駕在大內卽於明福門內置院駕在興
慶宮則於金明門內置院今在右銀臺門之北第一
門榜曰翰林之門其制高大重複入門直西爲學士
院卽開元十六年所置也引鈴於外惟宣事入其北
門爲翰林院有南廳北廳南庫北庫有畫堂虛廊曲
壁多畫怪石松鶴院內古槐松玉蕊藥樹柿子木瓜
菴羅峒山桃杏李櫻桃紫薔薇辛夷蒲桃冬青玫瑰

凌霄牡丹山丹芍藥石竹紫花蕪菁青菊商陸蜀葵

萱草紫苑諸學士至者雜植其間時以居翰院皆謂

凌玉清遡紫霄豈止登瀛洲哉亦曰玉署玉堂焉李肇

翰林志翰林院在禁中乃人主燕居之所玉堂承明金

鑾皆在焉沈存中夢溪筆談玉堂上東閣承旨居之西閣第

三廳居之玉堂後東西各二閣第三廳而下分處之

玉堂後東北一室二間大中祥符中王相居之入參

大政李相迪又自此閣拜命其後入者多求居之此

室常不空前簷有大槐樹意以為祥澠水燕談太宗以玉

堂之設虛傳其號而無名乃於紅綃上御書飛白四

字題曰玉堂之署以賜焉本院掛於玉堂之上職官分紀

學士院玉堂太宗常親幸至今學士上日許正坐他

日皆不敢坐堂中設視草臺每草制則具衣冠據臺

而坐筆談唐翰林壁畫海曲龍山詩云憶昔唐家局禁

地粉壁曲龍開古記承明景象今頓還永與鑾坡為

故事宋宣公詩玉堂兩壁有巨然畫山董羽畫水宋宣獻

公為學士時燕穆之復為六幅山水屏寄之乃置於

中門萬花谷玉堂東西壁延袤數丈待詔董羽畫水以

布之風濤浩渺蓋擬瀛洲之象也修篁皓鶴悉圖廊

廡奇花異木羅植軒砌每外喧已寂內務不至風傳

禁漏月色滿庭真人世之仙境也翰林續志元豐末既移

院玉堂中屏乃郭熙所作春江曉景坡詩云玉堂畫

掩春睡間中有郭熙春畫山詩話學士院舊號北門今

在行宮和寧門內蓋沿北門之制兩閣中有小龜頭

榜曰摘文堂蓋在京徽宗因廣直廬御書以賜強淵

明今乃汪藻所篆太上又嘗書玉堂二字賜學士周

麟之刻石廳上又東閣窻下甃小池傍植金沙月桂

之屬又有海棠郁李玉繡毬各一株西偏植金橘花

開時香滿院結實雖小而甘浙中未易得也皆玉堂雜記

有唐學士院深嚴非本院人不可遽入雖中使宣事

及有文書必先動鈴索立於門外俟小判官出授授

訖授院吏院吏授學士自五代以來其制久廢蘇易

簡因召對言上可其奏復置鈴索焉續翰林志玉堂後廡

建二閣悉畫烟嵐曉景上一寵禮唐翰林初選者試

制書批答二首賜宴營幕使宿設帷幕圓褥尚食供

饌酒坊使供美酒是為勅設就宴又賜衣一副絹二

十疋飛龍司借馬一疋旬日內庫給青綺錦被青綺
方搭青綾單帕漆通中枕銅鏡漆奩象篋大小象梳
漆箱銅梁羅銅觚椀紫綠履白布手巾畫木架床鑪
銅案席氈褥之類畢備內諸司供飲膳之物主膳四
人掌之內園官一戶三人以供役使其所乘馬送迎
於一仗門內擴門之西度支月給手力資四人人錢
三千五百四品以上加一人每歲內賜春暑服物各
三十疋綿七屯寒食節料三十疋酒餚杏酪粥屑肉
餽清明火二社蒸饅端午衣一副金花銀器一事百

索一軸青團鏤竹大扇一柄角糴三服沙蜜重陽酒
餠粉糕冬至歲酒兔野雞其餘時果新茗瓜新曆是
爲經制直日就授下直就第授賜凡內宴坐次宰相
居一品班之上別賜酒食珍果與宰相同賜帛二十
疋金花銀器一事每遇晦日上巳重九賜節錢一百
千其日奏選勝而會賜酒脯茶果忌日進名奉慰賜
茶十串李肇翰
林志學士舊規十月初別賜錦長襖子國
初以來賜翠毛錦太宗改賜黃盤雕錦金坡
遺事乘輿奉
郊廟承旨得乘廐馬自浴堂殿由內朝以從續翰
林志學

言明 卷之六
士之盛事有七新學士謝恩日賜襲衣金帶寶鞍名馬一也十月朔改賜新樣錦袍二也特定草麻利物三也改賜內庫法酒四也月俸並給見錢五也特給親事官隨從六也勅設供帳之盛七也

李昉禁林
燕會詩序

中

興後凡除拜節鉞以上多由中書進熟狀預可知之惟草后妃太子宰相麻則不容知快取數十輩來宣召云鎖小殿子既至便殿上服帽帶諭以除授之意御前列金器如硯匣壓尺筆格糊校水滴之類幾二百兩既書除目隨以賜之隆興初猶用此例乾道以

後止設常筆硯而已退則有旨打造不及例賜牌子金百兩立后升儲倍之一體貌百司申中書皆用狀惟學士用咨報不出名但當直學士一人押字而已謂之咨報此唐學士舊制也

歸田錄

咨報見於金坡遺

事元豐中詔於尚書省樞密院用咨報至今守之雖權臣用事官失其職此制不廢又三省密院於百司例用劄付惟學士院云劄送他官司得省劄必前連片紙書所受月日乃敢押字惟學士院徑判押其首又吏魁有錄事曹案白房皆稍擬中書尊內庭也

玉堂

雜記朝殿日皇太子宰相親王使相參政各有朱衣吏

二人自下馬處前導至殿門此外惟翰林學士有之

又禁門內許以茶鐐檐子自隨與執政等同滿宗孟

為學士神宗曰學士職清地近而官儀未寵自今宜

珮魚事學士每白事中書不具靴笏公服鞞鞋坐玉

堂使院吏入白丞相出迎後皆具靴笏章惇直學士

院力欲行之而卒不果

翰苑羣書

劉熙釋名曰尚書者何也尚上也言最在上總領之

也韋昭辯釋名云尚猶奉也百官言事當省案平處

奉之故曰尚書也尚衣尚食亦然按春秋傳曰百官

承事朝而不夕承事者言事而奉其文書也漢世官

名尚書義實取此如淳漢書注曰主天子文書曰尚

書如主壻曰尚主漢制娶天子女曰尚公主娶諸侯

女曰承翁主則尚猶承也尚猶奉也韋昭之解上合

左傳下協漢制比於劉熙依字音杜撰遠矣

朱文公語錄引禮云僕人師扶左射人師扶右即周

官太僕之職僕射之名蓋起於此以其朝夕近君後

世承誤以為宰相之號據此則射字音赦不當作夜

音也

古今官名 國朝因置多有用以稱謂者卒未解其義漫考而著之司空昔禹作司空孔安國曰司空主空土以居人按空穴也古者穴居詹事秦官掌皇后皇太子家應劭曰詹省也給也言給事皇后太子庶子禮記曰古者周天子有庶子之官職諸侯卿大夫之庶子掌其戒令與其教理別其等正其位秦因之置中庶子官洗馬國語云夫差爲勾踐洗馬漢太子少傅屬官有太子出則當直者一人在前導威儀蓋

洗馬之義也祭酒後漢以博士聰明威重者一人爲祭酒韋昭辨釋名曰祭酒者凡讌饗必尊長老以祭酒爲先故曰祭酒徐廣曰古人具饌則賓中長舉酒祭地示有先也太僕周禮有太僕下大夫二人穆王命伯冏爲太僕正漢書百官表云太僕秦官掌輿馬爲秩中二千石中書漢除挾書律文籍往往而出並藏之書府內有延閣廣內石渠之藏又御史中丞在殿中堂蘭臺秘書圖籍又未央宮中有麒麟閣天祿閣亦皮書猶今言內庫書也桓帝延熹二年始置秘

書監今以中書爲善書之稱非也太史左傳曰天子有日官卽太史也漢書百官表司馬談爲太史令一人掌天官星律祥瑞妖災凡歲將終奏新年曆而已今以稱修史之官非也修史自有史館史官著作郎及佐郎專掌國史

刺史漢初丞相遣史分刺諸州武元光三年初置郡刺史掌奉詔條察諸州秋冬入奏後漢則屬官皆自辟除以刺衆官及萬人非違故古謂之刺史與太守不同觀後漢郡國志可見漢制自三輔之外分九州

九州控郡國州部有刺史郡國有太守如豫州刺史部則潁川汝南六郡國冀州刺史部則魏郡而下九郡國畿內則河南尹京兆尹而以司隸校尉部之外則刺史部之郡國則太守治之州部則自河南京兆兩尹至豫冀兗徐青荆益梁并幽交爲尹二刺史十一而已郡國則自河南至日南爲郡國凡一百十有二太守亦百十有二人今州旣異漢所分置則知州亦不得稱刺史也

古人官有別稱者詹事曰儲端給事中曰夕郎中書

舍人久次曰閣老又曰老鳳又曰小鳳光祿曰飽卿
鴻臚曰睡卿司農曰走卿宗正曰冷卿衛侯曰煖卿
太常少卿曰清卿別駕曰半刺駙馬都尉曰粉侯禮
部儀郎曰大儀員外郎曰中儀又曰小儀唐詩紀事
李德鄰自右史拜小戎王極自小版拜小勳又羅袞
爲小天王冕任小賓又尚書故實杜紫微求小儀小
秋不遂後爲比部員外注云杜自叙不曾歷小比又
幽閒鼓吹李德裕爲兵部尚書杜邠公呼爲大戎後
爲太尉人呼爲掌武北夢瑣言周寶爲侍中人呼爲
大貂右補闕張曙人呼爲中諫唐御史久次一人知
雜事謂之雜端次一人知西雜三司號副端職林吏
部爲省眼戶部曰版使秘書監曰大蓬丞曰小蓬
史記臯陶爲大理一本大李又天官書曰熒惑爲李
徐廣注云外則理兵內則理政又黃帝有李法一篇
顏師古曰李者法官之號總兵刑故名李法北史叙
傳李氏先爲堯之理官因爲氏後改曰李則李理其
義自通又人行曰行李蓋人將有行必先治裝如孟
子之言治任鄭當時之言治行理亦治也左傳曰一

介行理又曰行理命之言
司徒以五典教民樂正以樂教國子自虞書分命夔契王制周禮尚遵其法王制以樂正列於冢宰司徒司馬司寇司空爲司徒者修六禮以節民性明七教以興民德齊七政以防淫一道德以同俗爲樂正者崇四術立四教順先王詩書禮樂以造士王太子王子羣后之太子卿大夫元士之適子國之俊選皆造焉司徒論選士之秀者升之學以王制言之則司徒所教之成材僅得升於樂正教國子之學周禮大司樂卽樂正之官掌成均之法成者如簫韶九成均者如樂律十二均蓋以樂取名其僚屬有樂師大小胥大師鍾師磬師笙師籥師等官皆以明樂爲國子師惟師氏保氏非專以樂官教國子保氏教六藝樂亦在其中以周禮言之則司徒卿也大司樂中大夫也或者殷周官制不同爾契之爲司徒其教民專以五教爲主孟子所謂人倫之教然師氏以三行教國子未嘗不用五典也夔之爲樂正其教國子專以樂爲主卽周禮所謂成均之法然司徒以六樂教民亦未

嘗不用樂也古樂既廢而國子之官不知樂且其官稱而已自漢以來尚以國子之官爲太常之屬猶存典樂教習之意至隋開皇十三年罷隸太常別爲國子寺後改曰學又曰館曰監不相統攝矣司徒掌教而以戶部擬之太常國子之官俱不知樂司徒亦不知教古人設官初意盡廢矣司徒之失其職由周禮誤之此俞壽翁所以作復古編也司徒之職宜當首言五典而其間多司空之事僅三物五物五禮六樂數條可爲司徒本文爾自宇文周立周禮六官隋唐因之今吏部禮部兵刑工之目實始於隋以吏戶禮爲左司兵刑工爲右司則自唐神龍元年始也後人因考工記補司空遂以工部擬之因司徒詳於土地遂以戶部擬之自六典多錯簡莫覩其全書隋唐變官制愈失其本職教民教國子之官豈復虞周之舊王制出於漢儒不足深信司徒樂正之教則虞書周禮可證也

古史官見於經史者武王時太史辛甲封上黨長子成王時有太史尹佚及太史司寇蘇公蘇公卽太史

故稱公是時蘇公以太史領司寇耳它如世本黃帝以沮誦倉頡爲左右史六韜禹有史疇呂氏春秋桀之時太史令終古出其圖法奔商湯時大旱七年殷史卜曰當以人禱淮南子記論訓殷紂時太史令向藝先歸文王向藝漢古今人表作向摯史通則呂氏春秋及通典俱作高勢漢古今人表有史扁周書穆王有左史戎又有史豹史良夫書前代興亡之數又論語周任莊子釋文彭祖世本云姓籛名鏗在商爲守藏史在周爲柱下史又左氏傳周内史叔興又內史過郊祀志有萇弘隋志有叔服伯儋史雍魯太史氏克左丘明外史齊太史南史子餘晉史董狐史蘇墨趙龜太史屠餘一曰屠黍左史楚左史倚相左史老衛太史柳莊華龍滑鄭太史秦內史廖虢史噐又太史公自叙云司馬氏世典周史蕭何以文無害爲沛主吏掾趙禹爲丞相亞夫吏府中皆稱其廉平然亞夫不任曰極知禹無害然文深不可居大府張湯給事內史爲甯氏掾以湯爲無害言大府師古注無害言最勝又曰傷害也言無人能

傷害之者觀後漢百官志秋冬遣無害都吏案訊諸
囚注案律有無害都吏如今言公平吏漢書音義曰
文無所枉害蕭何以文無害爲沛主吏掾正如此也
乃知無害吏亦漢律中語也
出銜之名當時選曹補授須存資歷開奏之時先具
舊官名品於前次書擬官於後使新舊相銜不斷故
曰官銜亦曰頭銜如人口銜物取其連續之義如馬
有銜以制其首前馬已進後馬續來相次不絕古人
謂之銜尾相屬卽其義也

漢制以本官任他職者曰兼常惠以右將軍兼典屬
國是也以高官攝卑職者曰領劉向以光祿大夫領
校書是也唐制有曰攝者如侍中之攝吏部是也又
有官序未至而以他官權攝者曰直如許敬宗直記
室是也又有行守試之別職事高者爲守職事卑者
爲行未正名命者爲試宋制則高一品爲行下一品
爲守下二等爲試元祐以後又置權官如以侍郎權
尚書之類漢制趙充國爲假司馬則又有假職矣
除拜官職謂除其舊籍不然也除猶易也以新易舊

言田 卷之六 三十一
曰除如新舊歲之除謂之歲除天保詩何福不除易
除戎器戒不虞以新易舊所以備不虞也塔謂之除
者自下而上亦更易之義也

唐制服色不視職事官而視階官之品至朝散大夫
方換五品服色衣銀緋封贈蔭子未至五品雖職事
官高未許易服色封贈之制雖宰相止許封一代其
封二代非特恩不可光祿大夫許門設祭戟吏三十
考轉銀青此其大略也白樂天爲中書舍人知制誥
元簡爲京兆尹官皆六品尚猶著綠其詩所謂鳳閣

舍人京兆尹白頭猶未脫青衫南宮啓事無多日朝
散何時復入銜劉夢得賀給事加五品詩曰八舍郎
官換綠衣元微之作武儒衡陞朝散大夫制曰今由
是級則服色驟加誠足貴矣樂天授朝散大夫制曰
蔭子封妻豈惟腰白金而已權德輿罷相爲檢校尚
書興元節度使改葬其父因表納檢校尚書回贈祖
任不許特贈禮部郎中呂溫代鄭相公謝戟十二枝
表曰吏考三十始秩銀青戰勳十二乃號桂國
唐誥勅宰相復名者皆不出姓惟單名則出姓宋誥

勅宰相雖單名亦不出姓我朝誥勅俱無宰相姓名外各衙門題奏本皆書姓名惟諸閣臣每有封擬題本揭帖進御雖官至師保尚書亦不具僉其於上並僉大學士臣某臣某僅存古制者此耳

起復者喪制未終勉其任用所謂奪情起復者也如歐公晏元獻神道碑明年遷著作佐郎丁父憂去官已而真宗思之卽其家起復爲淮南發運使及史嵩之喪父經營起復是也今人不考例以服闋爲起復誤矣宋制鈐銜上亦帶書如起復左僕射中書門下

平章事臣趙普是也

今之有功於國家者槩曰功勳曰功勞蓋以勞定國曰功輔成王業曰勳殊不知亦自有辨也周官司勳掌六卿賞地之法以等其功王功曰勳謂輔成王業若周公也國功曰功謂保全國家若伊尹也民功曰庸謂法施於民若后稷也事功曰勞謂以勞定國若夏禹也治功曰力謂制法成治若臯陶也戰功曰多謂克敵出奇若韓信陳平也則勳功庸勞力多六者各自有辨不可槩稱也

古有稱金貂者常侍侍中插貂以金爲柱也漢稱金紫者金印紫綬也其後江左入銜曰金紫光祿銀青光祿猶此意也唐所謂金紫者紫衫金帶也又賜紫及金魚袋後元復以金紫銀青入銜 國初亦因之印在秦漢以爲佩服之章至六朝尚因之故至小其丞相列侯不過寸餘不以施奏牘也唐用龜魚以代印而印用之奏牘矣至明而印之寸分加大矣明之所謂綬非綬制也芾也其牙牌則以代印及龜魚也古王公列侯皆金印丞相將軍亦金印今法親王金寶一二品銀印餘皆銅印古印列侯存者多銅印人不能曉所謂按古賜印外許得自製銅木牙印蓋倣印製而爲之金銀印不能存而銅獨得存故也

唐時將相告身用金花五色綾紙至宋則用織成花綾以品次有差宋勅俱草書後用三省長官僉押尚書印然無御寶當時每授官則有之至 國朝考最始給與一品至五品皆誥六品以下勅花色殊異公侯一品玉軸駙馬伯及二品犀軸三品四品鍍金軸餘角軸內唯御寶加於年月之上其特使則有勅勅

用小龍墨欄黃紙而已此宛委餘編所載余曾見宋
范忠宣公加僕射誥命真書不盡爲草也

東漢以九卿官府皆名曰寺與臺省並稱鴻臚其一
也本以待四夷賓客故摩騰竺法蘭自西域以佛經
至舍於鴻臚今洛中白馬寺摩騰真身尚在或云寺
卽漢鴻臚舊地摩騰初來以白馬負經既死尸不壞
因留寺中後遂以爲浮圖之居因名曰白馬今僧居
槩稱寺蓋本此也

漢書中載有諸官如湯官導官均官食官鐘官之類
意是當時設局主辦遂以其地名之非卽爲官名也
今考其地如鄭夏陽雍漆弘農宜陽安邑皮氏平陽
絳大陵隆慮河南陽城西平宛皖山陽沛武安都鄉
涿郡千乘東平陵歷城羸琅邪臨淄東牟鹽瀆堂邑
下邳朐沔陽臨邛武陽南安隴西漁陽夕陽平郭北
平郁秩莒東平魯彭城廣陵皆有鐵官安邑太原晉
陽堂陽章武千乘都昌壽光曲成東牟愷昌陽當利
海曲計斤長廣海鹽臨邛南安連然隴西三水弋居
獨樂龜茲富昌沃塹成宜樓煩泉州屬漁陽平郭巫番

禹高要皆有鹽官太原有家馬官懷河南宛東平陵
 泰山郡奉高廣漢雒成都皆有工官嚴道有木官胸
 忍魚復皆有橘官千乘有均輸官九江有陂官湖官
 廬江有樓船官南郡有發弩官南海有圍羞官有淮
 浦官羸樓有羞官襄平郁郅皆有牧師苑官襄邑臨
 淄皆有服官

漢書功臣表紀諸功臣初起官名及功封多有傳中
 所不載者今略紀之有以中涓以令史以舍人以騎
 將以刺客將以護軍以廐將以客以郎以將軍以職

志

主折

以都尉以執盾以特將以卒以連敖楚官以

長鈺都尉以戶衛以城將

將築城之兵

以隊帥以戶將以

隊將以重將

將輜重者也

以票客

票疾而賓客禮之故云韓信也

以門尉

以謁者以執盾隊史以塞路

遮塞要路也

以亞將以慎將

謹慎

以中謁者以駢鄰

並兩騎為軍翼也

以稅衛

軍行舍止之時主為

也衛以郎騎將以中郎騎以郎中騎以騎士以林將猶

羽林之

將也 以弩將以客吏以代大與

大與主爵之官

以內史

以上隊將以中廐令以令尹以羣盜長以騎司馬以
 車司馬以中尉以越連敖以軍匠以家車吏

主漢王之家車

也 以執予以郎中柱下令以家吏

漢制三公食祿號萬石謂一歲共食萬斛然考漢志三公俸月三百五十斛以歲計之四千餘斛耳成帝時益大司馬大司空俸注丞相大司馬俸錢月六萬御史大夫俸錢月四萬延平間定制中二千石月俸錢九千米七十斛真二千石錢六千五百米六十五斛比二千石錢五千米三十四斛其視前漢米減三之二錢減大半當時士大夫罕以俸薄爲言者唐初祿制王一品米七百石錢九千八百正二品米五百

石錢八千正三品米四百石錢七千大率如此自艱難以來增置使額大曆中權臣月俸有至九千貫刺史無大小皆千貫其視兩漢不啻數倍而兩漢職田無聞唐一品十二頃二品十頃以下皆有差唐之俸祿多於兩漢如此宋初俸入益薄景德四年詔折支者京官給見錢六分外任給四分元豐中行加俸至我朝則一品者月不過百餘石而五品以下往往有俯仰不足之憂矣

石奮號萬石君後漢馮勤曾祖父揚宣帝時爲弘農

太守有子八人皆爲二千石號萬石君東漢秦襲與羣從同時爲二千石者五人三輔號萬石秦氏唐張文瓘高宗時爲侍中四子皆至三品人謂之萬石張家又西漢嚴延年兄弟五人皆至大官東海號其母曰萬石嚴嫗馮揚父子九人皆二千石幾二萬石矣前書不載

蘇秦佩六國相印漢五利將軍佩六印謂五利天士地士大通天道五將軍樂通侯凡六印戰國犀首亦佩五國相印唐王忠嗣爲河西隴右節度使權朔方

河東節度使佩四將印

周禮三夫人九嬪二十七世婦八十一女御秦并天下官備七國爵列八品謂皇后夫人美人良人八子七子長使少使也漢興因秦之號至武帝又置婕妤姪娥倅華充依各有爵位而元帝加昭儀之號凡十四等昭儀視丞相爵比諸侯王婕妤視上卿比列侯姪娥視中二千石比關內侯倅華視真二千石比大上造美人視二千石比少上造八子視千石比中更充依視千石比左更七子視八百石比右庶長良人

視八百石比左庶長長使視六百石比五大夫少使
視四百石比公乘五官視三百石順常視二百石無
涓共和娛靈保林良使夜者皆視百石上家人子中
家人子視有秩斗食後漢光武中興六官稱號唯皇
后貴人貴人金印紫綬奉不過數十斛又置美人官
人采女三等並無爵秩歲時賞賜充給而已魏多沿
漢制間有增易晉武帝采漢魏之制置貴嬪夫人貴
人是爲三夫人位視三公淑妃淑媛淑儀修華修容
修儀婕妤容華充華是爲九嬪位視九卿其餘有美

人才人才人爵視千石以下宋高祖省二才人餘仍
晉制夫人魏武帝初建魏國所制貴嬪淑媛修容魏
文帝所制淑妃修儀魏明帝所制也建武三年省夫
人修華修容置貴妃位比相國進貴嬪位比丞相貴
人位比三司以爲三夫人又置昭儀昭容昭華以代
修華修儀修容又中才人充衣以爲散位昭華魏明
帝所制泰始元年又省淑妃昭華中才人充衣復置
修儀修容才人良人三年又省貴人置貴姬以備三
夫人之數又置昭華增淑容承徽列榮以淑媛淑儀

淑容昭華昭儀昭容修華修儀修容爲九嬪婕妤容
華充華承徽列榮凡五職班亞九嬪美人中才人才
人三爲散役其後又擬外百官備位置內職自後宮
通尹紫極戶主光興戶主爲一品以下各有名品位
次云南齊置貴嬪夫人貴人爲三夫人修華修儀修
容淑妃淑媛淑儀婕妤容華充華爲九嬪美人中才
人才人爲散職永明元年有司奏貴妃淑妃並加金
章紫綬佩于寘玉淑妃舊擬九棘進同貴妃以比三
司夫人之號名殊蕃國降淑媛以比九卿七年復置

昭容位在九嬪焉梁武深鑒奢侈配德早終長秋曠
位定令制貴妃貴嬪貴姬爲三夫人九嬪五職制同
宋氏以美人才人良人爲三職陳氏文帝天嘉之後
詔宮職備員無改梁舊後魏孝文改定內宮左右昭
儀位視大司馬三夫人視三公三嬪視三卿六嬪視
六卿世婦視中大夫御女視元士又置女尚書女侍
中等官齊文襄承前制兩宮自餘姬侍稱娘而已文
宣河清新令準漢制立左右昭儀比丞相弘德正德
崇德爲三夫人比三公光猷昭訓隆徽爲上嬪比三

言明 卷之六 三十一
卿宣徽凝暉宣明順華凝華光訓爲下嬪比六卿正
華令則修訓曜儀明淑芳華敬婉昭華光正昭寧貞
範弘徽芳猷婉華明範豔儀暉則敬信爲二十七世
婦比從三品穆光茂德貞懿曜光貞凝光範令儀內
範穆閨婉德明婉豔婉妙範德暉章敬茂靜肅章穆
華慎儀妙儀明懿崇明麗則婉儀靜修閑修靜弘明
慎豔光猗容徽淑秀儀芳婉貞慎明豔穆容修範肅
容茂儀英淑弘豔正信凝婉英範懷順修媛良則瑤
章茂成潤儀寧訓淑懿柔則穆儀修禮昭慎貞媛肅

閨敬順柔華昭順敬寧明訓弘儀崇敬修敬承閑昭
容麗儀閑華思柔媛光懷德良媛淑猗茂範良信豔
華徽娥肅儀妙則爲八十一御女比正四品武成好
內具員如文置才人采女以爲散號後主又置左右
娥英比左右丞相降昭儀比二大夫尋又置淑妃一
人比相國後周率由姬制隋開皇三年著內官之式
嬪三員視正三品世婦九員視正五品女御三十八
員視正七品又采漢晉舊儀置六尚曰尚宮尚儀尚
服尚食尚寢尚工視從九品六司曰司令司樂司食

司醫司筵司製視勳品六典曰典琮典贊典櫛典器
典執典會視流外二品後又置貴人三員時有宣華
容華夫人之號煬帝參詳典故令貴妃淑妃德妃爲
三夫人品正第一順儀順容順華修儀修容修華充
儀充容充華爲九嬪品正第二婕妤品正第三美人
才人品正第四是爲世婦寶林品正第五御女品正
第六采女品正第七是爲女御總一百二十以叙於
宴寢又有承衣刀人皆趨侍左右並無員數視六品
以下時又增置女官準尚書省以六局管二十四司

每司又置典及掌以貳其職六尚品從第五司品從
第六典品從第七掌品從第九女史流外無定員各
有司存焉唐制皇后而下有貴妃淑妃德妃賢妃是
爲夫人昭儀昭容昭媛修儀修容修媛充儀充容充
媛是爲九嬪婕妤美人才人各九合二十七是代世
婦寶林御女采女各二十七合八十一是代御妻自
餘六尚分典乘輿服御凡設六局二十四司凡一百
九十人女使五十餘人後世改復不常開元時以后
下復有四妃非是乃置惠妃麗華三妃六儀四美人

七才人而尚宮尚儀尚服各二參合前號大抵踵周官相損益云宋內命婦之品五曰貴妃淑妃德妃賢妃曰大儀貴儀淑儀淑容順儀順容婉儀婉容昭儀昭容昭媛修儀修容修媛充儀充容充媛曰婕妤曰美人曰才人貴人其外又有御侍押班紅霞帔紫霞帔之制真宗時有宸妃蓋似特加者大儀自五代時有之宮詞所謂大儀前日媛房來也

白樂天作類書名六帖通典選舉門載唐制曰開元中舉行課試之法帖經者以所習經掩其兩端中間惟開一行裁紙爲帖凡帖三字隨時損益可否不一或得四得五得六者謂之通此六帖之名所從起也六帖云者取中帖之數以名其書期於必中選也今選舉之法進士隋制卽古制科法第專用對策舉人漢制卽古孝廉第彼以行此以文歲貢意緣周禮而參以漢明經之制武舉唐武后制試以兵書宋仁宗天聖中行韓億之言也官生卽漢任滿三歲得任同產若子一人爲郎自吏二千石以上今亦止於三品而已吏員卽西漢試吏入官之法然今特不能取

大位援例監生卽晁錯入粟補爵之意加納官卽漢以貲爲郎之制天文生卽古方伎諸科國朝用人其途盡於此若古賢良方正博學宏詞書算童子直言極諫諸科悉格不行矣漢時射策對策其事不同蕭望之傳注云射策謂爲難問疑義書之於策量其大小爲甲乙之科列而置之不使彰顯有欲射者隨其所取得而擇之以知優劣射之言投射也對策者顯問以政事經義令各對之以觀其文詞定高下也

泥金帖子報新進士及第之名謂之喜信始於唐至文宗時革之宋則復用也似在南宋不用見中吳紀聞然考其制用黃紙塗金大書姓名於上下有兩知舉官花押仍用白紙爲貯之亦題姓名於上登第者隨附家書於中云

士人初登榮進士遷除慰賀歡宴謂之燒尾嘗有人言虎變爲人唯尾不化須焚除乃得成人以蒙初授如得爲人本尾猶在一云新羊入羣爲諸羊所觸不相親附火燒其尾則定又云魚化爲龍惟尾不化須

雷火焚之此說較前爲勝也又按談賓錄唐景龍中公卿大臣初拜官者例許獻食名曰燒尾蘇瓌拜僕射不燒尾則知燒尾之說不獨進士爲然矣
進士題名段成式曰慈恩寺題名自張蒼於寺中題其同年人因爲故事柳氏序訓又謂韋肇初及第偶於慈恩寺塔下題名後進慕效之按封氏記神龍已來杏園宴後慈恩塔下題名同年中推善書者紀之他時有將相朱書之及第後知聞或過未及第時題名則添前字故李紵不加前字到老恨焉則題名自

唐神龍初有之矣

國憲家猷載衣鉢二字始自佛氏五祖傳心印於盧行者謂之衣鉢五代和凝應舉自以榜首期待後乃

第五

他書云
十三非

及知選舉見范質之文尤爲驚賞卽以

第五處之語范曰欲君傳老夫衣鉢爾後范歷官皆與和同因而場屋間謂之傳衣鉢唐人撫言中載貢舉謝恩主司禮訖主事云請狀元曲講名第第幾人謝衣鉢注云衣鉢謂得主司名第其或與主司先人同名第卽謝大衣鉢按此則衣鉢之名唐人已有之

不始於和凝矣

試三場自唐天寶中始糊名自唐武后始覆試自宋開寶六年始御試不許稱門生於私門自宋太祖始賜詩自興國八年呂蒙正榜始分甲第自興國八年王世則榜始賜袍笏自祥符姚華榜始賜宴自呂蒙正始賜同出身自王世則榜始別科出身自咸平三年陳堯咨榜始唱名自雍熙二年梁顥榜始賜封彌謄錄覆考編排皆自大中祥符八年始殿試不黜落自仁宗嘉祐二年始進士第一人金吾司差七人導

從兩節前引自大中祥符八年始

唐世舉人呼已第者爲先輩其自目則曰前進士按魏文帝黃初五年立太學初詣學者爲門人滿歲試通一經補弟子滿二歲試通二經者補文學掌故不通者聽須後試故後試稱先試而得第者爲先輩由此也前進士云者亦放此猶曰早得進士而其輩行在先也此皆演繁露載通典語按容齋續筆載詒子錄云同年小錄是雙隻先輩各一人分寫宴上長少分雙隻相向而坐以東爲上觀以西爲首給舍員外

遺補多來突宴東先輩不遷而西先輩避位又紹聖
間王聖塗澠水燕談云蘇德詳漢相禹珪之子建隆
四年進士第一人登第初還鄉里太守置宴以慶之
樂作伶人致語曰昔年隨侍當爲宰相郎君今日登
科又是狀元先輩又司馬溫公勸學歌云一朝雲路
果然登姓名亞等呼先輩詳味溫公之言則登雲路
者方呼先輩如今黃甲並呼狀元一般先輩猶言前
名也又葛常之丹陽集云小說載優人有以李義山
服藍襖之衣而出或問曰先之衣何在曰爲館中

諸學士擣將去矣人以爲笑又王直方詩話云蕭貫
常夢至宮庭中賦詩有一人曰先輩異日必貴又春
渚紀聞載碁待詔劉仲甫聞祝不疑先輩名品高著
人傳今秋來試南省若以二家所載觀之則以先輩
爲稱呼決非前輩之比又韋莊浣花集有癸丑年下
第獻新先輩詩又墨客揮犀言今人於榜下擇婿號
曰鬻婿有一新先輩少年爲貴家所慕欲以女妻之
又彭應來有賀新先輩二十八人及第詩結句云回
頭應念差池者重待陽和振羽毛言新先輩則爲狀

元為前名明矣若以為長上先生則安得加一新字
 又曰少年撫言載牛僧孺應舉時韓愈皇甫湜見之
 於青龍寺稱牛為即先輩又田表聖錫咸平集與胡
 旦書云秀才即先輩乃即日可為先輩也其義甚明
 今人詩集中因見唐詩有先輩二字不深考其故皆
 誤作前輩近時有稱道士為先輩尤可笑也

乘所
 紀也

說略卷之六終

吳人以為笑又王直方詩話云前輩

此吳榜
 宜齋野

